

Sanhgyangh:

Feihyiz Haeuj Hagdangz Coi Swnjcienz

Ndwen 1 ngoenz 2, bouswnjcienz feihyiz Cinz Gveicinh youq Sanhgyangh Dungcuz Swciyen Sanhgyangh Cunghyoz sonyinx hagseng haglien dinfwngz daemj man Dungcuz. Geij bi neix daeuj, aen hagdangz neix yungh cauhlaeb aen bujdungh gauhcungh miz daegsaek swcigih guh seizgei, haenqrengh doihengz moix aen ban hai dangzgoq Dungcuz vwnzva caeuq yisuz “leih doh gyauyuz”, doenggvaq bae cingj caeuq gungganq lauxsae ciennieb, bienguh cek sawson hagdangz Dungcuz vwnzva, cauhbanh aen guenj vwnzva feihyiz hagdangz, haiguh ciet vwnzva yisuz hagdangz daengj banhfap caemh yungh, aeu golaux Dungcuz, gij siuq Dungcuz, man Dungcuz, gyong laz gimz yienz Dungcuz daengj feihyiz vwnzva lai yiengh yinx haeuj hagdangz, yinx haeuj dangzgoq, yinx haeuj sawson, guhbaenz aen diji daegsaek banhhag “dangzgoq ciennieb + dangzgoq daegsaek” “gihcuj gyauyuz + leih doh gyauyuz” “sedonz hozdung+dangzgoq rog dangz”, hawj hagseng ndawhag ndwenngoenz fungfouq doengzseiz, rengzrwd coicaenh vwnzva daihdaih doxcienz.

(Gungh Bujgangh/龚普康)



▲Hagseng hag daemj man.

Nanzningz: Cawx Huq Gvaq Cieng

Ndwen 1 ngoenz 4, ciet huq ciengmoq Gvangjsih 2020 youq Nanzningz Gozci Veicanj Cungsim guh, aen ciet neix guh 17 ngoenz, 600 lai aen diemq daj Gvangjsih caeuq gak dieg daengx guek daeuj haenx baij gai gij huq miz daegsaek Gvangjsih caeuq gij huq miz daegsaek gak dieg daengx guek, yinx ndaej haujlai siminz Nanzningz bae cawx.

(Yiz Sienghceenz/喻湘泉)



▲Vunz daeuj cawx huq gvaq cieng lai dangqmaz.

Ganj Guh Buhvaq Minzcuz Gvaq Cieng

Ndwen 1 ngoenz 5, mehmbwk Yauzcuz Fungsanh Yen Bingzloz Yauzcuz Yangh Hungzli Cunh cingq nyib guh buhvaq minzcuz. Yaek daengz ndwencieng, mehmbwk Yauzcuz aen cunh neix ganj nyib guh buhvaq minzcuz, caepcawq guh gak hangh vunzlai vwnzva hozdung mboengq ndwencieng. Ciuq cam rox, Fungsanh Yen gak mbanj mboengq ndwencieng yaek haiguh vwnzva haeuj fanh ranz, vunzlai yienjheiq, lwgmbwk dauq ranzmeh daengj guh'angq hozdung lai cungj lai yiengh, hawj gyoengq vunz gvaq mbat ciengmoq angqyangz, huzndei ndeu.

(Couh Wnhgwz/周恩革)

Yungzsuij: Bae Hoihbo Coux Ciengmoq



▲Caezgya caemh caij din venz.

Ndwen 1 ngoenz 5, dwg ciet aenvenz gaeuqgeq Liuj-couh Si Yungzsuij Myauzcuz Swciyen Liengzcai Yangh Dalij Cunh Mbanjgozlij. Ca mbouj geijlai bak aen doih venz daj Gvangjsih, Gveicouh daengj dieg daeuj haenx, baenz fanh bous Myauz, Dung daengj beixnuengx minzcuz vunznoix, doxcomz giz ndeu, diuq Fouxyauz, doxdax boq venz, angqcoux ndwencieng bimoq daeuj-daengz.

(Lungz Linzci/龙林智)